

Xojon carta xi kitjei-la xita Hebreo

Kós'ín chjako-ná Nainá it'aà ts'e Ki'ndí-la

¹ Nga tisa kjòtseé, jè Nainá kjìn k'a kiichja-la xita jchínga-ná nga jñà kisikjeén xita xi kiichja ngajo-la, nga kjìn skaya tjín-ne kós'ín kiichja-la. ² Tanga i'ndeí, nga tífehet'aà nachrjein, Nainá, jè ki'ndí-la tísikjeén nga tíchjako-ná kò tije-ne ki'ndí-la kisikjeén nga tsibíndaà isò'nde kò jè kjòngatsja ngats'ìi nga yije tsojmì xi tjín isò'nde. ³ Kò jè Ki'ndí xi okó jè kjoá isén kò kjoá jeya-la Nainá; kò it'aà ts'eé 'ya-ná kó kji kjoàn-ne Nainá. It'aà ts'e nga'ño xi tjín-la 'én-la Cristo síjnangui'ño-la isò'nde. K'e nga jye kitsjaà kjotjò yijo-la nga kisitsjeè-ná jé-ná, ikjoàn tsijin ngajmì nga tsibìjnat'aà chrja kixi-la Nainá. ⁴ Nga jè Ki'ndí-la Nainá tíjna ítjòn; isaá 'ño 'nga tíjna mì k'oa-ne koni jñà àkjale, koií kjoa-la nga isaá 'ño 'nga tíjna jè 'ín xi kitjoé-la.

⁵ Nga jè Nainá, nijngoò k'a k'oas'ín kitsò jngoò-la àkjale:

Ji-né xi ki'ndí-na xan-lè,

'an-ná Na'èn-lè.

Tikoaá nijngoò àkjale xi kitsò-la:

'Aán koma Na'èn-la,

jè koma ki'ndí-na.

⁶ K'e nga kisikasén ki'ndítjòn-la i isò'nde tikoaá k'oaá s'ín kitsò:

Ngats'ìi àkjale-na kàteèxkón.

⁷ It'aà ts'e àkjale, k'oaá tsò:

Nainá, maá-la tjo s'ín àkjale-la;
jñà chi'nda-la maá-la ní'ín s'ín.

⁸ Tanga it'aà ts'e ki'ndí-la tsò-né:

Ji-né xi Nainá,
kixíi kotixomai nita kjé-né.

⁹ Matsjacha-né kjoa xi ndaà tjín
ko majticha-né kjoa xi ch'o tjín;
koií kjoa-la, 'an xi Nainá 'mì-na xó jaàjìn-lè
nga isa ndaà jchaxkón-lè
mé-ne nga isa tse kjotsja s'e-lè
koni jñà xita xinguíi xi báhjtako-lè.

¹⁰ Tikoáá tsò-né:

Ji Na'èn xi Nainá 'mì-lè nga ji otixomai,
nga sa tàts'en-la kjoa, jíi tsibìndii isò'nde,
tjiji-ne xi tsibìndii ngajmii.

¹¹ Ngaji kijna-né nita mé nachrjein-ne.
Tanga jè isò'nde ko ngajmii kjoehet'aà-né;
k'oaá s'ín kojchá koni ma nikje nga ma jchínga.

¹² K'oaá s'ín kíxkóyi koni jngoò x'íó,
k'oaá s'ín sikjatjìyi koni s'ín fatjìya nikje.
Tanga ngaji mì kì kjoatjìya-lè nita kjé-ne
ko jñà nachrjein-lè mìkì kjoehet'aà.

¹³ Nainá nì saà jngoò k'a kitsò-la jngoò àkjale-la:
Tijnat'eii chrja kixi-na
skanda k'e nga sìkíjnanguia kondra-lè
ya ñánda nga nchasòn ndsokoiì.

¹⁴ Ngats'ii àkjale, inima-né nga síxá-la Nainá; jñà
nikasén nga síchját'aà-la jñà xita xi tjoé-la kjondaà
nga bitjokàjìn kjo'in kjoa ts'e jé-la.

2

Mé-ne 'ñó chjí-la 'én xi jye kina'yá it'aà ts'e Cristo

¹ Koií kjoa-la, mochjeén-né nga nguì sa ndaà sis'in-lá 'én xi jye kina'yá, mé-ne nga mì xìn ndiyá kjaán koni s'in tjín ndiyá-la Nainá. ² Jñà kjoṭixoma xi Nainá kitsjaà nga kisikjeén àkjale nachrjein xi jye tsato, tjín-la okixi, ko jñà xita xi tsohótsji jé nga mìkiù kisikitasòn kjoṭixoma xi kits'iì-la, kjo'iín kitjoé-la koni s'in ok'in-la. ³ Ko jñà xi titsajnaà nachrjein i'ndeì, isaá 'ñó s'e-ná kjo'in tsà mì kì sis'iaán 'én-la Cristo nga jè kochrjekàjìin-ná kjo'in. Nga jè sobá Na'è-ná kitsjaà ítjòn-ná 'én koi. Ko jñà xi iskan kiì'nchré 'én koi, tikoáá tsibénajmí-ná nga kixi kjoa. ⁴ Nainá, tikoáá kisikixiya 'én koi nga kjin skoya kjoṭkón kis'iín xi okó kjoa jeya-la Nainá, tikoáá kisika'bísòn kjoṭjò ts'e Inima Tsjeè-la; k'oaá s'in kitsjaà koni s'in mejèn-la jè.

Yá xi ochrjekàjìin-ná kjo'in kjoa ts'e jé-ná

⁵ Nga Nainá mìtsà jñà àkjale-la kitsjaà-la nga jñà kjoṭixoma-la jè isò'nde xi iskan kjoíí, jè xi titsachibàya-ná. ⁶ Ta saá tíchjaá jngoò k'a Xojon-la Nainá ñánda nga tsò:

Ji Na'è-né, ¿yá-né xi xita?

¿A ok'in-la nga ji nìkìtsjeèn-ne ko makájno-lè it'àà ts'e?

⁷ Isaá nangui kinikíjni koni jñà àkjale,

kits'iì-la kjoa jeya ko 'nga kinikíjni nga tsatixoma,

⁸ jíí kits'iì-la nga'ñó nga ma kjoṭixoma-la ngats'iì tsojmì xi tjín.

Tsà Nainá kitsjaà-la nga'ñó nga jè kjoṭixoma-la ngats'iì tsojmì xi tjín tsòyaá-ne nga nìmé tsojmì tjín xi mì jè otixoma-la. Kixií kjoa, nachrjein i'ndeì,

kj'eè kiì ndaà 'ya-là tsà jè tíhotíxoma-là ngats'iì tso-
 jmì xi t́jín. ⁹ Tanga 'ya-ná nga jè Jesús, ñas'ín nan-
 gui kinikíjna chiba nàchrjein koni j́ña àkjalè, tanga
 i'ndeì, jeyaá t́jna kò 'ngaá t́jna nga tíhotíxoma, koií
 kjoa-là nga kjo'in kisìkjeiín k'e nga k'en. Nainá, 'ñó
 matsjakeè-ná nga kisìkasén Jesús nga jè kisìkjeiín
 kjo'in ts'e kjoabiyaà xi kjòndaà ts'e ngats'iì xítà.

¹⁰ Jè Nainá, xi tsibíndaà yije nítà mé xi t́jín,
 ndaá ok'in-là koni s'ín kis'iín k'e nga kisìkatojiín
 kjo'in Ki'ndí-là mé-ne nga it'aà ts'e kjo'in xi
 tsatojiín-ne, nímé kjoa xi kichijàt'aà-là nga
 koma kòchrjekàjiín-ná kjo'in kjoa ts'e jé-ná
 ngats'iì xi ixti-là Nainá maá xi jè mejèn-là nga
 ya kítsajna kooá ñánda nga jeya t́jna jè. ¹¹ Jè xi
 tísítsjeè xítà xi t́jín-là jé, kò j́ña xítà xi t́jmatsjeè,
 tajngoó Na'én ma. Koií kjoa-là jè Ki'ndí-là Nainá
 mikií masobà-là nga 'ndse tsò-là xítà xi sítsjeè. ¹² Jè
 Xojòn-là Nainá k'oaá s'ín t́jt'aà nga tsò:

Kènojmí-là j́ña xítà 'ndsè xi it'aà tsíji,
 seè-lè ya ijiín-là xítà naxandá-lè.

¹³ Tíkooá t́jt'aà ñánda tsò:

Jé Nainá ma'ñót'aà takoàn.

Íjngoò k'a t́jt'aà ñánda tsò:

Íí t́jna kooá ixti xi Nainá kitsjaà-na.

¹⁴ K'oaá s'ín t́jín koni ixti-là xítà, tajngoò jní-né kò
 tajngoò yijo-né. Jesús, k'oaá tís'ín jní kò yijo kis'e-là
 mé-ne nga it'aà ts'e kjoa biyaà ma kisìkijne-là
 xítà neíí xi t́jín-là nga'ñó nga ma-là sík'en xítà.

¹⁵ Jesús, k'oaá s'ín komàt'in mé-ne nga komà
 kisìkítsajnandèjí ngats'iì xítà xi kitsakjòn-là kjoa
 biyaà nga k'oaá s'ín títsajna koni tsà t́jt'aà'ñó-là kó
 t́jín nàchrjein bìtsajnakon xítà. ¹⁶ Jesús, mìtsà koií

xá j'ìi-ne nga jǎà àkjalè sǐichját'aà-la, jǎà x̄ita tje-la Abraham sǐichját'aà-la. ¹⁷ K'oaá s'ín komà-ne, jè Jesús tǐnè-la nga ngàsòn k'oas'ín x̄ita komà koni 'ndse, mé-ne nga nò'miì ítjòn koma-ne xi tǐn-la kjohimatakòn xi ndaà síkitasòn xá-la Nainá nga koma kǐichjítjì-ne jé-la x̄ita it'aà ts'e kjoa biyaà-la. ¹⁸ Koni s'ín kichìt'aà nga kits'ìi-la kjo'in, jè, k'oaá tǐs'ín ma-la osìko jè x̄ita xi kò kjo'in tíchìt'aà-ne.

3

Mé-ne ìsà jeya tǐjna-ne Jesús mì k'oq-ne Moisés

¹ Jǎò ndí 'ndsè, xi x̄ita naxandá tsjeè-la Nainá 'mì-nò, xi xó k'oaá s'ín jaàjìin-nò Nainá nga x̄ita ts'e tsò-nò, k'oaá s'ín ndaà tǐkítsjeèn nga jè Cristo Jesús xi xó tsibíxáya-la Nainá kò jè tǐjna nga nò'miì ítjòn it'aà ts'e kjoa xi mokjeiín-ná. ² Jesús ndaà síkitasòn xá-la Nainá, nga xó k'oaá s'ín kits'ìi-la koni jè Moisés, ndaà kisìkitasòn it'aà ts'e naxandá-la Nainá. ³ Jesús ìsàá jeya tǐjna koni jè Moisés. K'oaá ngaya-la koni jngòò x̄ita xi bíndaà ni'ya, ìsàá jeya bíjna nei-la mì k'oaá-ne koni tǐjè-ne ni'ya. ⁴ Ngats'ìi ni'ya, tsejèn tǐjn x̄ita xi tsibíndaà; tanga jè Nainá xi tsibíndaà yije tsojmì xi tǐjn ìsò'nde. ⁵ Xi nguì okixi, jè Moisés, nga x̄ita chì'nda-la Nainá ma, ndaà kisìkitasòn xá-la it'aà ts'e x̄ita naxandá-la Nainá. Jè xá xi kis'ìin, jè-né nga kitsjaà 'én kó s'ín kichja Nainá k'e nga koma ìskan. ⁶ Tanga jè Cristo, nga Ki'ndí-la Nainá ma, jè otíxoma it'aà ts'e naxandá-la, jè naxandá-la xi tǐjǎá-ná, tsà kixi títsajnaá skanda k'e nga kjoehet'aà nachrjein koni s'ín nga mokjeiín-ná it'aà ts'e Nainá nga kò kjotsja-ná títsachiñá xi kjondaà-la Nainá.

Mé xi mochjeén nga kitjás'éeñ ñánda ma ñikjáyaá it'aà ts'e Nainá

⁷ K'oaá tsò jè Inima Tsjeè-la Nainá jè xojon xi tjit'aà 'én-la Nainá, nga tsò:

I'nde, tsà titsana'yà jñò 'én-la Nainá,

⁸ kì tájaàjìin bitsajnakoo inima-nò

koni s'ín kis'iin jñà xita xi kondra kii-la Nainá

nga kiskoòt'aà ya i'nde it'aà xìn ñánda nangui kixi choòn.

⁹ Jñà xita jchínga-nò kiskoòt'aà-na

nas'ín jye kijtseè ichán nó kjoa xi kis'iaàn.

¹⁰ Koií kjoa-la nga tsohótijna jchán-la jñà xita koi,

k'oaá kixan-la: “Jñò, kjit'aà nàchrjein xìn ndiyá

tjaàkoo kjohítsjeèn-la inima-nò

ko mìkii yaxkon ndiyá-na.”

¹¹ Xi kjoa jti-na, k'oaá s'ín kitsjaà ndsoba

nga mìkii kjoahas'en-jìin i'nde ts'an ñánda ma ñikjáya.

¹² Ndí 'ndsè, t'een kindá yijo-nò, nijngoò xi ch'o síkijna inima-la nga mìkii mokjeiín-la mé-ne nga

mì kìnchat'aaxìn-lá Nainá xi tijnakon. ¹³ Ta saá,

nàchrjein nchijòn tjiì nga'ñó-laà xinguiòo, k'e nga

tijna-isa nàchrjein, mé-ne nga mìkii kotájaàjìin-ne

inima-nò nga mìkii ma skónachan-nò kjoa ts'e jé.

¹⁴ Jñá yaá nokjoá-aná it'aà ts'e Cristo, tsà k'oas'ín

ndaà kòkjeiín-ná skanda k'e nga kjoehet'aà

nàchrjein koni s'ín kòkjeiín-ná nga tisa tàts'en-la

kjoa.

¹⁵ Xojon-la Nainá k'oaá s'ín tichja nga tsò:

I'nde, tsà titsana'yà jñò 'én-la Nainá,

kì tájaàjìin bitsajnakoo inima-nò

koni s'ín kis'iin jñà xita xi kondra kii-la Nainá.

16 ¿Yá x̄ita-ne xi kiì'nchré 'én-là Nainá, ikjoàn kon-dra kiì-là? Tijñà-ne ngats'ìi x̄ita xi jè Moisés tsachrjekàjìin ì'nde Egipto. 17 ¿Kò yá x̄ita-ne xi ichán nó tsibijnajchán kò Nainá? Jñà-né x̄ita xi tsohótsji jé, xi ya k'en ya iya ndiyá ya ì'nde it'aà xìn ñánda nangui kixi choòn. 18 ¿Kò yá x̄ita-ne xi Nainá kitsò-là nga mìkiì kjoahas'en-jìin ì'nde ñánda tjín kjoa ñìkjáya? Jñà-né x̄ita xi mìkiì kiì'nchréñijon-là. 19 Kò k'oaá s'ín tísijìin-ná nga mìkiì jahas'en-jìin ì'nde ñánda ma ñìkjáya, koií kjoa-là nga mìkiì kòkjeiín-là.

4

1 Nainá k'oaá s'ín kitsjaà-ná 'én nga kitjás'eén ya ì'nde-là ñánda ma ñìkjáyaá. K'e nga tákó tijná-isa 'én xi kitsjaà Nainá, ngats'iaá mochjeén-né nga ndaà sikindaá yijo-ná mì k'oa-ne tsà mì kì kitjás'eén. 2 Nga jñá, k'oaá tìs'ín jye kis'enojmíya-ná 'én ndaà-là Nainá, koni s'ín kis'enojmíya-là jñà x̄ita jchínga-ná. Tanga jñà x̄ita jchínga-ná ñimé kjondaà kisakò-là nga mìkiì ngàsòn kòkjeiín-là koni jñà x̄ita xi i'nga xi kisìtasòn jñà 'én koi. 3 Tanga jñá xi jye mokjeiín-ná, kitjás'en-ná ya ì'nde ñánda ma ñìkjáyaá, ñánda kitsò Nainá:

Xi kjoa jti-na, k'oaá s'ín kitsjaà 'én-na xi ndsoba kichjà-na
nga mìkiì kjoahas'en-jìin ì'nde ts'an ñánda ma ñìkjáyaá.

Tanga Nainá jye kjòtseé jyehet'aà xá xi kis'ìin kóni skanda k'e nga tsibíndaà isò'nde. 4 Xojon-là Nainá, k'oaá s'ín tíchjā ts'e xi ma-ne itoò nàchrjein:
Xi ma itoò nàchrjein kisìkjáya Nainá nga komà jyehet'aà yije xá-là.

⁵ Tijè-ne Xojon-la Nainá, ìjngoò k'a tìchja ñánda tsò: Mikiì kjoahas'en-jìin ya ì'nde-na ñánda ma ñìkjáya. ⁶ Jñà xità xi kiì'nchré ítjòn 'én xi ndaà tsò, mikiì jahas'en ì'nde ñánda ma ñìkjáya nga mikiì kisitasòn; tanga nachrjein ì'ndeì tjín-ìsa xità xi chija nga koma kjoahas'en-jìin ì'nde ñánda ma ñìkjáya. ⁷ Koií kjoa-la Nainá tsibíjna ìjngoò-ìsa nachrjein xitse, jè nachrjein ì'ndeì. Nga ìsa 'ñó komà iskan jè xitaxá ítjòn xi ki'mì David, k'oaá s'ín tsibít'aà Xojon-la Nainá jñà 'én xi tsò:

Jñò, nachrjein ì'ndeì tsà titsana'yà 'én-la Nainá

kì tájaàjìin ñìkítsajnaà inìma-nò.

⁸ Jè Josué, nga mikiì komà kitsjaà-la kjoa ñìkjáya jñà xità Israel, koií kjoa-la Nainá kitsjaà ìjngoò-ìsa nachrjein xitse. ⁹ K'oaá ma-ne jè naxandá-la Nainá tíjna ìjngoò-la nachrjein tsjeè ts'e kjoa ñìkjáya; ¹⁰ nga jè xità xi fahas'en-jìin kjoa ñìkjáya xi ts'e Nainá, tìkooá síkjáya-ne kjoa ts'e xá-la, koni s'ín kisìkjáya Nainá ít'aà ts'e xá xi kis'ìin. ¹¹ Mochjeén-né nga k'oi-lá nga'ñó yijo-ná nga kitjás'en-jñaá kjoa ñìkjáya-la Nainá; mikiì k'oas'ín s'eén koni kis'ìin jñà xità xi mikiì kòkjein-la nga kisikitasòn.

¹² 'Én-la Nainá tíjnakon-né kò tjín-la nga'ñó. Ìsaá ndaà ote mì k'oa-ne jngoò kichja ndojò xi yijò nga ingajò ngobà-la; fahas'en-jìin-né skanda ya jìjìin inìma-ná kò ya jìjìin kjohitsjeèn-ná. Tìkooá fahas'en-jìin-né skanda ñánda tíkjoò nindaà-ná kò iya nindaà-ná; ótsjiya-né kjohitsjeèn-la inìma-ná mé xi mejèn-la nga s'ìin. ¹³ Ngats'ìi xi Nainá tsibíndaà, nì mé tjín xi tíjna'ma, nga ngats'ìi kjoa

tíjna tsejèn-né; tíbeè-ne xkon jè xi tjinè-là nga k'oi-lá kindà.

Jè xi ngui nò'miù ítjòn tíjna

¹⁴ Jesús xi ki'ndí-là Nainá, jè-né xi ngui sobà nò'miù ítjòn tíjna it'aà tsaján, jè-né xi jahas'en ngajmiù nga nguixkon Nainá. K'oaá ma-ne nga mochjeén-né nga kixi kitsajnakoaá jñà 'én xi mokjeiin-ná. ¹⁵ Jè xi nò'miù ítjòn tíjna it'aà tsaján, komaá kohimakeè-ná k'e nga mahindaà; nga jè, k'oaá tis'in kichit'aà koni jñá, tanga mìtsà jé tsohótsji. ¹⁶ Kíjngoò-lá takoán nga kinchat'aá chrañà-lá íxile kjotixoma-là Nainá xi tse kjondaà tjin-là, mé-ne nga skoe ima-ná kjondaà xi tjin-là koa kosiko-ná k'e nga mé xi kochjeén-ná.

5

¹ Ngats'ii jñà nò'miù ítjòn, yaá tjaájiin it'aà ts'e xita naxandá. Jè xá tjinè-là nga chjatji xita nga nguixkon Nainá tikoá tsját'aà-là kjotjò Nainá kò sík'en cho xi kjoá ts'e jé-là xita. ² Jñà nò'miù, tikoáá mahindaàjiin inima-là; k'oaá s'in ma-ne nga ma beèhima jñà xita xi mìkiù machiya-là kò xi xìn ndiyá tíjmayá. ³ Koií kjoá-là nga ma indaàjiin inima-là nò'miù, tjinè-là nga sìik'en-là cho kjotjò xi tsjá-là Nainá xi kjoá ts'e jé-là kò tikoá sìik'en cho kjoá ts'e jé-là naxandá.

⁴ Jñà nò'miù, mìtsà tà jñà tajngoò bí't'aà xá 'nga yijo-là; jè Nainá xó chja-là koni s'in kiichja-là jè Aarón. ⁵ K'oaá tis'in tjin it'aà ts'e Cristo, mìtsà tà jè tajngoò kiskoé xá xi ts'e nò'miù ítjòn, Nainá kitsjaà-là xá 'nga k'e nga kitsò-là:
Ji-né xi Ki'ndí-nà xan-lè;

'aán-ná xi Na'èn-lè.

⁶ Tijè-ne Xojòn-là Nainá, ìjngoò k'a tìchjā ñánda tsò: Jì-né xi no'miì tijni nìtā mé nàchrjein-ne, xá-lè, k'oaá s'ín tjin koni xá xi kisikitasòn Melquisedec.

⁷ Jè Cristo k'e nga sa tsibìjna i isò'nde, 'ñó kìchjat'aà-là Nainá, nguì koó ndáxkon tsibítsi'ba-là koa kisijét'aà-là jè xi tjin-là nga'ñó nga ma-là kòchrjekátjì ìt'aà ts'e kjoa biyaà; Nainá kii'nchré-là nga ndaà kijtseèxkón. ⁸ Jè Cristo, nas'ín ki'ndí-là Nainá ma, yaá komà-là kisikitasòn, k'e nga kisikjeín kjo'in. ⁹ K'e nga jye mì tì mé xi kichijàt'aà-là, k'oaá s'ín tsibìjna nga jè kòchrjekátjì kjo'in xitā nìtā mé nàchrjein-ne, ngats'ìi xi 'nchréñijon-là, ¹⁰ Nainá kisikìjna Jesús nga no'miì ítjòn tsibìjna, kitsjaà-là xá koni ts'e Melquisedec.

Jñà xitā xi mìkìi machiya-là mé kjoa xi kixi tjin

¹¹ It'aà ts'e kjoa koi, 'ñó tjin'isa kjoa xi s'enojmiya-nò, tanga 'ñó chjā tjin nga s'enojmí-nò, koi kjoa-là nga jñò, mìkìi machiya-nò. ¹² Jñò, skanda kjòtseé maestroó-là titsajnaà tsà ndaà; tanga jñò, tákó mochjeén-nò nga chíta'yà xitse ìjngoò k'a 'én-là Nainá xi mì 'in chjā koni s'ín komà-nò nga sa ítjòn. K'oaá s'ín tímat'ioòn koni ndí ixti xi tákó tsjín 'biì, mìkìi mochjeén-là nga tsojmì tájaà skine. ¹³ Ngats'ìi xi tákó tsjín 'biì, ixti-né, mìkìi machiya-là mé kjoa xi kixi tjin. ¹⁴ Tanga jñà tsojmì xi ma chine xi tájaà kjoàn, ts'eé xitā xi jye kòjchínga, jñà xi jye machiya-là mé kjoa xi ndaà tjin kò mé kjoa xi mìkìi ndaà tjin nga k'oaá s'ín nchisíjchá yijo-là.

6

1 Koií kòs'ín mochjeén-ne nga chíta'yà 'én-la Cristo xi ìsà ndaà kojchíngakoá kjoa ts'e Nainá mé-ne nga nímé chijat'aà-ná nga xítà-là Cristo maá. Mì tijnà tijnà 'én chíta'yà-aná xi kichità'yá nga sà ítjòn it'aà ts'e Cristo. Mì tijnà tijnà 'én sikítsjeèn-ya-ná kó s'ín ma nga nìkájnoá jé xi tjin-ná xi kjoabiyaà fikò-ná. Kò tikoáà mì tijnà tijnà 'én sikítsjeèn-ya ìjngò k'a-ná kó s'ín kòkjeín-ná it'aà ts'e Nainá ² kò kós'ín ma bautizar xítà, kò kós'ín oyijòsòn-lá ndsaá jñà xítà xi mokjeín-là it'aà ts'e Cristo. Kò tikoáà mì tijnà tijnà 'én sikítsjeèn-ya ìjngò k'a-ná kó s'ín kjoááya-là jñà xítà xi jye k'en, kò kós'ín s'jin Nainá nga kìnndaàjìin-là xítà mé xi ok'in-là nga tsjá-là nità kjé-ne. ³ Mochjeén-né nga chíta'yà 'én xi ìsà ndaà kojchíngakoá kjoa ts'e Nainá; tsà Nainá tsjá'nde nga kòs'ín koma, k'oas'ín s'één.

⁴ Nga jñà xítà xi jye kjòhiseèn-là kjòhítsjeèn-là, xi jye kisaseèn-takòn kjondaà xi tsjá Nainá, xi tikoá jye ngásòn kitjoé-là Inimà Tsjeè-là Nainá, ⁵ xi jye kisaseèn-takòn 'én ndaà-là Nainá kò nga'ño-là isò'nde xi sà kjoíí, ⁶ tsà ìjngò k'a xìn ndiyá kjoí, tsà tsjìn takòn 'én-là Nainá, mì tì kii koma kondaàya-ne kjòhítsjeèn-là nga koófat'aà ìjngò k'a-là Nainá; nga jñà xítà koi, kjoa xi nchis'ín, k'oaá ngaya-là koni tsà krò nchihót'aà ìjngò k'a jè Ki'ndí-là Nainá nga tsjá-là kjosobà nga nguixkòn ngats'ìi xítà. ⁷ K'oaá s'ín ngaya-là koni jè nangui, k'e nga 'ba jtsí, ma'nchì'nde-né. Tsà ndaà xka xi bisò xi mochjeèn-là xítà xi síxáko nangui, jè Nainá síchikon-t'in nangui. ⁸ Tanga tsà na'yá chinì kò na'yá xanchroò bisò, nímé chjí-là, mìtsà nangui

ndaà nga nguixkõn Nainá; kijchò nàchrjein nga tà kiti-né.

⁹ Jñò ndí 'ndsè, xi matsjacha-nòjen, nas'ín k'oas'ín nokjoà-jen, k'oaá s'ín tíjngòò takòn-jen nga tjoé-nò kjoa xi 'ñó ndaà tjín, ngats'iì kjondaà xi tjín-la xita xi jye itjokàjìn kjo'in. ¹⁰ Nga Nainá, xita kixi-né, mikiì síjchàajìn xá-nò xi jye ki'nè kò kjoatjòcha xi tjín-nò nga nìchjât'aà-la xita naxandá-la Cristo, koni s'ín titsa'nè skanda nàchrjein i'nde. ¹¹ Tanga ngajen, k'oaá s'ín mejèn-najen nga kjit'aà nàchrjein nguì koó kjotsja nga kos'ín tixá nga jngòò ìjngòò skanda k'e nga kjoehet'aà nàchrjein-nò mé-ne nga kítasòn-ne kjoa xi titsachiñá-laá. ¹² Majìn-najen nga ts'eè s'een. Chjínngù-la jñà xita xi jye nchitjoé-la kjotjò koni s'ín kitsjaà tso'ba Nainá koií kjoa-la nga ndaà mokjeiín-la kò tjín-la kjoatsejta.

Kó tsò 'én xi küchja Nainá koni s'ín kitsjaà-la tso'ba Abraham

¹³ Nainá k'e nga kitsjaà-la tso'ba Abraham, k'oaá s'ín kitsjaà kixi 'én-la nga tijè tsasèn-ne nga mì ti yá tjín-ne xi isa 'nga tíjna koni jè; k'oaá s'ín küichja, ¹⁴ nga kitsò: “An, 'ñó ndaà sichikon-t'in-lè, tikoá 'ñó kòkjìn-ya jñà ìxti-lè.” ¹⁵ K'oaá s'ín komà-ne Abraham kiskoòñàkjoa, ìkjoàn kitjoé-la koni s'ín kitsò Nainá. ¹⁶ Jñà xi taxki xita, k'e nga tsjá 'én-la, síkjeén jngòò 'ín-la jngòò xi isa 'nga tíjna mé-ne nga síkixiya-ne 'én xi tsjá. Kò tà yaá fehet'aà kjoa. ¹⁷ K'oaá s'ín ma-ne k'e nga jè Nainá k'oaá s'ín kjòmejèn-la nga kitsjaà kixi-la 'én jñà xita xi tjoé-la kjotjò nga síkítasòn koni s'ín kitsjaà tso'ba, kitsjaà jngòò 'én xi 'ñó xkón tjín nga nímé xi ma

kjoatjìya. ¹⁸ Jñà 'én koi xi jò ma-ne xi mìkì ma fatjìya, nga mìkì koma skónachan-ná Nainá, yaá 'ñó sakó-la nga'ñó inìma-ná, jñá xi mejèn-ná nga Nainá kosìko-ná nga ngui jè kjit'aà takoán nga titsachiñá-lá jè kjoa kixi-la xi jè jye kitsjaà-ná. ¹⁹ Jè kjoa kixi xi titsachiñá-lá, k'oaá s'ín síkìjna kixi inìma-ná koni jngoò kicha xi sit'aà'ñó-ne chitso, kò jè kjoa kixi xi okji skanda maá jahas'en ya j'nde tsjeè ñánda tjobájtoò nikje cortina, ²⁰ ya ñánda jahas'en Jesús nga tsohójnandaà-ná ndiyá, nga no'miì ítjòn tìjna nìta mé nachrjein-ne koni jè Melquisedec.

7

Jesús, k'oaá s'ín ngaya-la koni jè no'miì ítjòn xi ki'mi Melquisedec

¹ Melquisedec xi xìta xá ítjòn tsibìjna ts'e naxandá Salem, tìkoa no'miì ítjòn tsibìjna ts'e Nainá xi tìjna ngajmì, kù kaña-la Abraham k'e nga tínchrobá-ne nga jye kisìkijne yije-la xìtaxá ítjòn xi kiskaàn-kò. Melquisedec kisìchikon-t'ín Abraham.

² Jè Abraham, teya kis'iìn tsojmì xi kisakò-la ts'e kjoajchán, kò jngoòya kitsjaà-la Melquisedec. 'Ín xi 'mì Melquisedec, tsòyaá-ne: xìtaxá ítjòn xi tìjn-la okixi. Tìkoa jè 'ín xi 'mì xìtaxá ítjòn ts'e Salem, tsòyaá-ne: xi tìjn-la kjoa'nchán. ³ Jè Melquisedec mìkì 'ya-la tje-la, yá na'èn-la, yá nea-la, ñánda kits'iìn, ñánda k'en; k'oaá s'ín mangásòn-kò koni Cristo xi Ki'ndí-la Nainá nga jè Melquisedec tìkoa no'miì ítjòn tìjna nìta mé nachrjein-ne.

⁴ Jñò tìkìtsjeèn nga 'ñó 'nga tsibìjna Melquisedec, skanda jè xìta jchínga-ná Abraham teya kis'iìn

tsojmì xi kisakò-là ts'e kjoajchán, kò jngoòya kit-sjaà-là Melquisedec. ⁵ Kixí kjoa, k'oaá s'ín tíchja kjotíxoma-là Moisés xi Nainá kitsjaà-là nga jñà xítà naxandá tjinè-là nga teya sùjòya tsojmì xi tjin-là, jngoòya tsjá-là jñà nò'miì xi tje-là Leví, nas'ín tì xítà xíkjin-ne xi ya nchrobát'aà-ne tje-là Abraham. ⁶ Tanga jè Melquisedec, mìtsà tje-là Leví, tanga kitjoé-là xi jngoòya oko-là tsojmì xi teya kis'iin Abraham, ikjoàn k'eé kisichikon-t'in, nas'ín jè Abraham xi kitjoé-là 'én xi tso'ba Nainá kiichja-ne. ⁷ Nga jyeé tíjìn-ná, jè xi síchikon-t'in xítà, isaá 'nga tíjna mì k'oaá-ne koni jè xi machikon-t'in. ⁸ Jñà nò'miì xi tje-là Leví xi tjoé-là xi jngoòya oko-là xi teya s'ín xítà naxandá Israel, mìtsà ta bitsajnakon kjit'aà, bijchó nàchrjein nga biyaà; tanga it'aà ts'e Melquisedec, jè Xojon-là Nainá, k'oaá s'ín 'ya-là koni tsà jngoò xítà xi tákó tíjnakon skanda nàchrjein j'ndeì. ⁹ Jñà nò'miì xi nchrobát'aà-ne tje-là Leví xi tjoé-là xi jngoòya oko-là xi teya s'ín xítà naxandá Israel, komaá k'oakixoán nga tikoáá jè Melquisedec kitjoé jngoòya-là it'aà ts'e xítà koi k'e nga kitsjaà jngoòya-là Abraham, ¹⁰ nga jñà nò'miì xi tje-là Leví, yaá nchrobát'aà-ne tje-là Abraham. Nas'ín kj'eè kiì ts'iin Leví k'e nga jè Melquisedec ijchò kaña-là Abraham, k'oaá s'ín ngaya-là koni tsà jñà nò'miì Israel, jyeé ya títsajnakò Abraham nga nchitsjá-là kjotjò xi jè tjoé-là Melquisedec.

¹¹ Jñà kjotíxoma xi kitjoé-là jñà xítà Israel, yaá inchrobát'aà-ne it'aà ts'e nò'miì xi tje-là Leví; tanga jñà nò'miì koi, mìkiì komà-là nga jngoò k'a kisikixiya xítà nga mì tì mé chijat'aà-là. K'oaá s'ín

komà-ne nga j'ìi ìjngoò nò'miì xi jè mangásòn-kò Melquisedec, kò mìtsà jè mangásòn-kò Aarón xi tje-là Leví. ¹² K'e nga fatjlya nò'miì, kós'ín síxá, tìkoáá mochjeén-né nga kjoatjlya kjotíxoma. ¹³ Koni s'ín tíchja 'én-là Nainá, jè xi kitjoé-là xá koni ts'e Melquisedec, kj'eíi tje-né; ya ñánda inchrobàt'aà-ne, nì saá jngoò nò'miì bitjokàjìn. ¹⁴ K'oaá s'ín 'ya-là nga jè Nà'én-ná Jesucristo, yaá inchrobàt'aà-ne tje-là naxandá Judá. Tje-là naxandá jè, mìkiì kisìkaxkì Moisés k'e nga kiìchja it'aà ts'e nò'miì.

¹⁵ Kjoa koi, ìsaá ndaà makixiya-ná tsà jè nò'miì xitse sùkitasòn koni s'ín kisìkitasòn jè Melquisedec. ¹⁶ Nga mìtsà k'oaá s'ín kitjoé-là xá ts'e nò'miì koni s'ín tíchja kjotíxoma yá ts'e tje xi inchrobàt'aà-ne nga nò'miì kisìkitasòn. Ta saá k'oaá s'ín kitjoé-là xá it'aà ts'e nga'ño xi tjín-là nga mìtsà yá xi koma-là jngoò k'a sùk'en. ¹⁷ K'oaá s'ín tíchja 'én-là Nainá xi it'aà ts'e, nga tsò:

Ji-né xi nò'miì tijni nità mé nàchrjein-ne,

k'oaá s'ín mangásòn-koi koni jè Melquisedec.

¹⁸ K'oaá s'ín komà-ne nga kichijàngui kjotíxoma jchínga, koi kjoa-là nga tsjin-là nga'ño tìkoá mì tì kiì tímochjeén-ne. ¹⁹ Nga jè kjotíxoma jchínga xi kiskì Moisés, nímé xi kisìkixiya xita; tanga nàchrjein i'ndeì, tjín ìjngoò-ná kjoa xi ìsa ndaà tjín xi titsachiñá-lá jè xi sikinchat'aà chrañá-ná Nainá.

²⁰ Nainá k'oaá s'ín kitsjaà kixì 'én-là xi xkón tjín k'e nga kitsjaà tso'ba nga nò'miì ítjòn kíjna Cristo. Jñà nò'miì xi i'nga, ta k'oaá s'ín kitjoé-là xá, mìtsà yá xi kitsjaà 'én-là. ²¹ Tanga xi it'aà ts'e Nà'én-ná

Jesús, k'oaá s'ín tichja xojon xi tít'aà 'én-la Nainá nga kitsò:

Na'èn-ná k'oaá s'ín kitsjaà kixi 'én-la;

mikiì sùikjatjìya-la kjohítsjeèn-la nga tsò:

“Ji-né xi no'miù tìjni nìta mé nachrjein-ne.”

²² K'oaá s'ín ma-ne nga jè Jesucristo osen-tjì-ná nga nguixkon Nainá nga jè bíndaajìin ko-ná jngoò kjoa xitse xi ìsaá ndaà tjin. ²³ Tikoáá jñà no'miù xi kisixá xi tje-la Leví, jyeé kjìn ma xi jye kisikitasòn xá-la tanga koií kjoa-la nga biyaá nga mikiì ma síxá-ìsa. ²⁴ Tanga jè Jesús tíjnakon-ne nìta kjé-ne, k'oaá ma-ne nga no'miù tíjna nìta mé nachrjein-ne. ²⁵ K'oaá s'ín ma-ne nga ma-la ochrjekajìin kjo'in xita nìta mé nachrjein-ne, ngats'ù xita xi it'aà ts'e Jesús bijchó nguixkon Nainá; jè tíjnakon-né nìta kjé-ne mé-ne nga bítsi'batjì xita.

²⁶ It'aà tsaján, nguì jè Jesús xi mochjeén-ná nga no'miù ítjòn tíjna: nga xita tsjeè-né; nímé jé tjin-la; mì tje kji inìma-la; tíjnat'aàxìn-la xita jé, ko jè xi ìsa 'nga tíjna ján ngajmiù. ²⁷ Mìtsà k'oas'ín koni s'ín no'miù ítjòn xi i'nga, nga nachrjein nchijòn sík'en cho nga tsjá kjotjò-la xi kjoa ts'e jé-la, ikjoàn tsjá ts'e jé-la xita naxandá. Tanga Jesús k'e nga kitsjaà kjotjò yijo-la nga k'en, jngoò k'aá kitsjaà nìta kjé-né. ²⁸ Jè kjotíxoma xi kitsjaà Moisés, k'oaá s'ín tichja nga jñà kítsajna no'miù ítjòn xi taxkì xita xi chiba nga'ño tjin-la; tanga jè 'én xi xkón tjin xi iskan kitsjaà Nainá, k'oaá s'ín tichja nga jè Ki'ndí-la Nainá, kijná no'miù ítjòn, jè xi k'oas'ín kisìko Nainá nga nímé chijat'aà-la nìta kjé-ne.

8

Jè kjoa xitse xi tsibí'ño Jesús

¹ Ngats'ii kjoa xi chibàya-ná, tjin jngoò xi isáá 'ño chjí-la, jè-né nga tjna jngoò-ná no'miì ítjòn xi tsibìjnat'aà chrja kixi-la íxile kjotíxoma-la Nainá ján ngajmiì. ² Yaá síxá ya ñánda tjna xi nguì Ni'ya Tsjeè-la Nainá, xi jè sobà Nainá tsibíndaà; mìtsà taxki xita tsibíndaà.

³ Ngats'ii no'miì ítjòn, k'oaá s'ín satíxoma-la nga kjotjò tsját'aà-la Nainá kò cho sík'en; k'oaá ma-ne nga jè Cristo tikoá tjinè-la nga kis'e-la mé kjotjò xi kitsjaàt'aà-la Nainá. ⁴ Jè Cristo, tsà i tjna it'aà nangui, skanda mì-la kii koma nga no'miì kína, nga i it'aà nangui, jyeé tjin no'miì xi tsját'aà-la kjotjò Nainá koni s'ín tjin kjotíxoma xi kiskii Moisés.

⁵ Tanga jña no'miì xi tjin i it'aà nangui, yaá síxá ni'ya xi tà isén-la-né kò 'nguién-la-né jè Ni'ya Tsjeè-la Nainá xi tjna ngajmiì; nga jè Moisés k'e nga jye mejèn koìts'ia nga kiiindaà ni'ya tsjeè-la Nainá xi nikje, jè Nainá kitsò-la: “Ndaà chítsejìn, k'oa kó kji t'iin koni kji xi tsakoò-lè ya nindoò Sinaí.” ⁶ Tanga nachrjein i'ndeji, isáá ndaà tjin xá xi kitjoé-la Jesucristo nga no'miì ítjòn tjna, nga jè osijnajìn jngoò kjoa xitse xi isa ndaà tjin xi tsibíndaajìn Nainá kò xita, nga yaá nchrobát'aà-ne 'én xi isa ndaà tjin koni s'ín jye kitsjaà tso'ba Nainá.

⁷ Tsà nime xi kisichijàt'aà-la jè kjoa xi kisin-daajìn ítjòn, mì-la kii mochjeén nga i jngoò k'a sindaajìn xi ma-ne jò k'a. ⁸ Tanga Nainá k'e nga tsohótiko, k'oaá kitsò:

Kijchò nachrjein k'e nga kiiindaajìn-kò jngoò kjoa xitse

jñà x̄it̄a Israel k̄o x̄it̄a Judá, kitsò Nainá.

⁹ Jè kjoa x̄it̄se xi k̄indaàj̄iìn-koaa, m̄itsà k'oas'ín s̄indaàj̄iìn koni ts'e x̄it̄a jchínga-la, k'e nga 'an sobà kitsobà tsja nga tsachrjekàjñàà nangui Egipto. Jñà x̄it̄a koi, mìkìl̄ kisìkitasòn koni s'ín kisindaàj̄iìn, k'oaa komà-ne nga kitsj̄ìn takoàn, tsò Nainá.

¹⁰ K'e nga jye koma iskan, jè kjoa x̄it̄se xi k̄indaàj̄ñàakoaa x̄it̄a Israel, kiís'ín s'e, tsò Nainá:

Kjot̄ixoma-na yaá k̄ijnajñàà ya kjoh̄itsjeèn-la, k̄o yaá skiaà j̄iìn in̄ima-la.

'An-ná xi Nainá k̄it̄so-na, k̄o jñà-né xi koma x̄it̄a naxandá-na.

¹¹ Mì t̄i k̄iì k̄ochjeén-ne nga x̄it̄a x̄íkjín keènoj̄m̄iya-la

n̄i m̄itsà jè 'ndse keènoj̄m̄i-la nga skoexkon Nainá, nga ngats'iì x̄it̄a skoexkon-na mats'iāko-ne xi is̄a ixti skanda jñà xi 'ñó x̄it̄a jchínga.

¹² 'Aán sījchàat'aà-la ngats'iì kjoa ch'o xi kis'iìn, mì t̄i k̄iì sīk̄itsjeèn-na jé xi t̄j̄ín-la.

¹³ K'e nga Nainá síkaxk̄i ījngò kjoa x̄it̄se, tsòyaá-ne nga jè kjoa xi kisindaàj̄iìn ít̄jòn, jyeé k̄ojchínga. Mì t̄i k̄iì tímochjeén-ne, jyeé tíchija.

9

Jè Ni'ya Tsjeè-la Nainá xi nikje

¹ Jè kjoa xi tsibindaàj̄iìn ít̄jòn Nainá kis'eé-la kjot̄ixoma kós'ín ma nga jeya n̄ik̄ijnaá Nainá k̄o kis'e jngò-la ni'ya tsjeè īit'aà nangui. ² Jè Ni'ya Tsjeè-la Nainá xi nikje, k'oaa s'ín t̄j̄indaà nga jngò īnde

tíjna ítjòn xi 'mì I'nde Tsjeè, ñánda tíjna kịchạ xi tịya ni'ín kọ ñánda tíjna ímịxạ xi nchason inchrạjín tsjeè-lạ Nainá. ³ Jè nikje cortina xi ma jò-ne xi tịobá jngoò osen ni'ya nikje, ya ijton kijina i'nde xi 'mì I'nde xi ìsạ 'Nó Tsjeè. ⁴ I'nde jè, yaá kijina jngoò kaxạ xi nguì oro ñánda tìsòn chrjngó-lạ Nainá; tịkoạ yaá kijina kaxạ xi nguì oro yijàjno ts'e kjoạ xi tsibíndaajìln Nainá. Kaxạ jè, tíjnaya jngoò tịjị kịchạ xi nguì oro ñánda 'ncha inchrạjín xi 'mì maná, tịkoạ yaá kjinaya yá nise-lạ Aarón xi tsibíjts'én-t'aà chrja-lạ kọ ya 'ncha jñà ndajo teè ñánda tịjít'aà kịotíxoma-lạ Nainá xi kitjoé-lạ Moisés. ⁵ Ya isòn kaxạ 'ncha isén-lạ àkjalẹ xi querubín 'mì xi tịjín-lạ jngáá xi okó kjoạ jeya-lạ Nainá; jñà jngáá-lạ bíjtsa'ma jè kaxạ. Tanga i'ndeì, jñà kjoạ koi, mìkìl mochjeén nga íjngó íjngó skaya koxkị.

⁶ K'e nga jye k'oas'ín kisinchaàndaà tsojmì koi, jñà nọ'miì, kịt'aà nachrjein fahas'en ya Ni'ya Tsjeè-lạ Nainá xi nikje, jè i'nde xi tíjna ítjòn, nga síkitason xá-lạ nga beèxkón Nainá. ⁷ Tanga jè i'nde xi ma-ne jò, ta jè tajngoò nọ'miì ítjòn fahas'en jngoò k'a nga jngoò nó; k'e nga fahas'en, tịjìnè-lạ nga jnị-lạ chọ 'ba xi tsját'aà-lạ Nainá kjoạ xi tịts'e-ne jé-lạ kọ ngats'ìì jé-lạ xịtạ naxandá, jñà xi mìkìl tịjìln-lạ tsà jé ótsjị. ⁸ Jè Inịma Tsjeè-lạ Nainá k'oaá s'ín sịkíchịya-ná, k'e nga tákó jè tímochjeén Ni'ya Tsjeè xi nikje xi kisindaà ítjòn, k'j'eè kị táx'a'nde nga kọma kịjás'eén jè I'nde xi ìsạ 'Nó Tsjeè. ⁹ Jñà kjoạ xi komà kịjótseé, tà kjoạ mangásòn-né koni s'ín tíma nachrjein i'ndeì; nga jñà kịjótjò kọ jnị-lạ chọ xi kịxíxteèn i'nde jè, tsjìn-lạ nga'ño nga sịìtsjeè kịjohítsjeèn-lạ xịtạ xi k'oas'ín beèxkón Nainá.

¹⁰ Kjoa koi, tà kjoa ts'eé yijo-la xita, mé tsojmì xi ma chine ko xi ma 'yò, koa kós'ín sítsjeè yijo-la xita; tà k'oaá s'ín tjen kochjeén skanda k'e nga jè Nainá sùkijatjya-la ngats'iì kjoa koi.

Nga'ño xi tse tjín-la jè jní xi tsibíxteèn Cristo

¹¹ Tanga jyeé j'ìi Cristo nga no'miì ítjòn tjina it'aà ts'e kjondaà-la Nainá xi jye tíma. Yaá jahas'en Ni'ya Tsjeè-la Nainá jè xi isa 'ño ndaà choòn ko xi isa kixi tjín, nga mìtsà tsja xita kisindaà-ne jè xi tsò-ne kjoa nga mìtsà i it'aà nangui kisindaà. ¹² Cristo, jngoò k'aá jahas'en ya I'nde Tsjeè. Mìtsà ti jní-la tíndsó ko jní-la nchraja jahas'en-ko-ne. Ts'e sobá jní jahas'en-ne. K'oaá s'ín kis'iìn nga tsibíchjítjì jé-ná, mé-ne nga komà kisikítsajnandejií-ná nita mé nachrjein-ne. ¹³ Jè jní-la nchraja ko jní-la tíndsó ko chijo-la nchraja kitì xi nchraja chjoón ki'ndí, maá-la sítsjeè yijo-la xita xi xa'ya-la k'e nga xíxteèn-jno. ¹⁴ Tsà k'oaá s'ín bitasòn kjoa koi, jè jní xi tsibíxteèn Cristo, isaá tse nga'ño tjín-la. Nga it'aà ts'eé nga'ño-la Inima Tsjeè xi tjínakon nita mé nachrjein-ne nga kitsjaà kjotjò-la Nainá yijo-la xi mìtsà mé jè tjín-la. Jè jní-la Cristo sítsjeèya kjohítsjeèn-nò nga mì ti kii koa tis'ín s'en-nò kjoa xi fiko-ná kjoabiyaà, mé-ne nga ma sixá-là Nainá xi tjínakon.

Jè kjoa xitse xi tsibíndaàjiìn Nainá ko xita

¹⁵ K'oaá ma-ne nga jè Cristo osijnajiìn osen koni s'ín tsibí'ño jngoò kjoa xitse. K'e nga k'en ngajo-la xita, jè tsibíchjítjì jé-la xi tsohótsji xita k'e nga tisa jè tíhotíxoma kjoa xi kisindaàjiìn ítjòn, mé-ne ngats'iì xita xi xó jaàjiìn-ne tjoé-la kjotjò xi tsjá Nainá nita kjé-ne koni s'ín kitsjaà 'én-la Nainá xi tso'ba

kiichja-ne. ¹⁶ K'e nga jngoò xita mejèn-la síka'bí tsojmi xi tjín-la, bíndaà jngoò xojon xi bí'ño. Skanda k'eé mochjeén k'e nga biyaà jè xita xi bíndaà. ¹⁷ Tanga xojon jè, nimé chjí-la k'e nga tikj'eé biyaà xita xi tsibíndaà; skanda k'eé chjí-la k'e nga kijá. ¹⁸ Jè kjoa xi kisindaàjìn ítjòn k'oaá tis'in kisindaàjìn nga cho k'en mé-ne komà kixixteèn-ne jní. ¹⁹ Moisés, k'e nga jye tsibíxkejìn-la xita naxandá ngats'iì kjotíxoma-la Nainá, ikjoàn kiskoé jní-la tíndsó ko jní-la nchraja ki'ndí ko kisikájin nandá; ko kiskoé jngoò chrja-la yá hisopo ko tsja-la orrè xi inì kjoàn; jahajìn jní-la cho; ikjoàn tsibíxteèn-jno jè xojon xi tjít'aà kjotíxoma-la Nainá; k'eé tsibíxteèn-jno ngats'iì xita naxandá. ²⁰ Moisés kitsò: “Jè jní jè xi síkixiya kjoa nga koma sikitasòn koni s'in tsibíndaàjìn-ko-nó Nainá.” ²¹ Moisés, tikoáá tsibíxteèn-jno jní jè Ni'ya Tsjeè-la Nainá xi nikje ko ngats'iì tsojmi xi mochjeén k'e nga yaxkón Nainá. ²² Koni s'in tíchja xojon xi tjít'aà kjotíxoma-la Nainá, mejèn tsà ngats'iì kjoa, saá jní matsjeèya-ne; tsà mìkiì xixteèn jní, mìkiì koma jchat'aà-la jé-la xita.

²³ K'oaá s'in kjòchjeén nga jní-la cho matsjeèya-ne jè Ni'ya Nikje Tsjeè ko tsojmi xi tjíya xi mochjeén k'e nga yaxkón Nainá; jña tsojmi koi, ta okó-né koni choòn ján ngajmiì; tanga jña xi tjín ngajmiì, mochjeén-né nga biyaà jngoò xi isa xkón tjín mé-ne koma kotsjeèya-ne.

²⁴ Tanga Cristo, mìtsà ya jahas'en Ni'ya Nikje Tsjeè xi tsja xita kisindaà-ne, xi ta okó xi tjín ngajmiì. Cristo, nguì yaá jahas'en ngajmiì nga nguixkon Nainá nga tíchjatjì-ná. ²⁵ Mìkiì k'oa's'in

kjìn k'a jahas'en ya ngajmiì nga kitsjaàt'aà kjotjò yijo-la, koni s'ín no'miù ítjòn nga xkì nó fahas'en I'nde xi 'Ñó Tsjeè, nga fahas'en kò jní xi mìtsà ts'e. ²⁶ Cristo tsà kjìn-la k'a jahas'en ngajmiù tìkoà tjinè-la nga kjìn k'a sùkjeíin kjo'in kó-ne skanda kisindaà isò'nde. Tanga i'ndeí, nga jye tífehèt'aà nàchrjein, ta jngoò k'a j'ii nga kitsjaà kjotjò yijo-la nga tsibíxteèn jní-la, mé-ne nga kitjaàxìn-ne kjoà ts'e jé nità mé nàchrjein-ne. ²⁷ K'oaá s'ín tjin nga ngats'ii xita, ta jngoò k'a biyaà, kò iskan kjoíi jè nàchrjein nga sindaàjìn-la. ²⁸ K'oaá tìs'ín tjin it'aà ts'e Cristo, ta jngoò k'a kitsjaàt'aà kjotjò yijo-la nga tsibíxteèn jní-la, mé-ne nga kjìn xita tjáxìn-ne jé-la. Xi ma-ne jò k'a, kitjojen ijngoò k'a-ne ngajmiù; mìtsà tì jé kjoaàxìn-ne; koíi xá kjoíi-ne nga kochrjekàjìn kjo'in jña xita xi nchikoña-la.

10

Mé-ne 'ño chjí-la jè kjoà biyaà-la Cristo

¹ Jè kjotíxoma-la Nainá xi kitjoé-la Moisés, mìtsà nguì jña kjondaà xi iskan j'ii; ta 'nguién-la né xi tsakó. K'oaá ma-ne nga jngoó k'a mìkiù koma nguì tsjeè sùkítsajna xita xi xkì nó síchrañat'aà-la Nainá nga tijnà tijnà kjotjò tsjá-ne. ² Jè kjotíxoma, tsà jngoò k'a kisitsjeèya jé-la xita, mì-la tì kiù sùkájno-ne tsà jé tjin-la; tìkoáà mì-la tì kiù jní-la cho tsjá kjotjò-ne. ³ Tanga jè jní-la cho, xkì nó xkì nó síkítsjeèn-ya jé-la xita. ⁴ Nga jè jní-la nchraja kò jní-la tíndsó mìkiù ma-la faáxìn jña jé-la xita.

⁵ Cristo, k'e nga j'ii i isò'nde kitsò-la Nainá: Majìn-lè jní-la cho xi biyaà, kò kjotjò xi tsját'aà-lè xita,

tanga jè yijo-na kinikijnandei.

⁶ Mikii sasén-lè cho xi kiti, ko ni jña kjotjò xi tsjá-lè xita xi kjoa ts'e jé-la.

⁷ K'eé kichjà, kixan-lè: “Koni s'ín tíchja xojon-lè xi it'aà ts'an,

íí tijnáa nga sikitasoàn koni s'ín mejèn-lè,

ji xi Nainá 'mì-lè.”

⁸ Cristo, ítjòn kitsò: “Majìn-lè ko mikii sasén-lè jní-la cho xi biyaà ko kjotjò xi tsjá-lè xita, cho xi kiti ko kjotjò xi tsjá xi kjoa ts'e jé-la”, nas'ín k'oas'ín tíchja kjotixoma nga tjínè-la nga koatjín xi tsjá xita.

⁹ Ikjoàn kitsò isa: “Íí tijnáa nga sikitasoàn koni s'ín mejèn-lè.” K'e nga os'ín kiichja, tsòyaá-ne nga jè Cristo jaàxìn jè kjoa jchínga mé-ne nga kisikíjna ngajo-ne xi kjoa xitse. ¹⁰ K'oaá s'ín komà nga kisitsjeèya inima-ná Nainá it'aà ts'e Na'èn-ná Jesucristo k'e nga kos'ín kisikitasòn koni s'ín mejèn-la Nainá nga ta jngoò k'a kitsjaà kjotjò yijo-la nita kjé-ne k'e nga k'en.

¹¹ Ngats'ii no'mii, nachrjein nchijòn síkitasòn xá-la nga kjìn k'a tsját'aà-la Nainá xi tijná tijná-ne kjotjò xi mikii ma-la faáxìn jé-la xita. ¹² Tanga Jesucristo ta jngoò k'a kitsjaàt'aà kjotjò yijo-la kjoa ts'e jé nita kjé-ne, ikjoàn tsibijnat'aà chrja kixi-la Nainá. ¹³ Yaá tíkoña skanda k'e nga kijchò nachrjein nga jña xita kondra-la siichija nga jè Nainá siikítsajngui ndsoko. ¹⁴ Ta jngoò k'aá kitsjaàt'aà kjotjò yijo-la mé-ne nga ngui ndaà kjòkixiya-ne xita nita kjé-ne, jña xita xi tímatsjeè. ¹⁵ Jè Inima Tsjeè-la Nainá ndaà síkixiya-ná kjoa koi; nga sa ítjòn tsò-né:

¹⁶ Jè kjoa jè xi kındaajìin-koaa jña xita

k'e nga jye koma iskan, tsò Na'èn-ná:
 Jñà kjoṭixoma-na sikhajnaà inima-la,
 ko yaá skiaa jjiin kjohítsjeèn-la.

¹⁷ Ikjoàn tsò-isa:

'An, mì tì kiì siikítsjeèn-na jé xi tjín-la
 ko ngats'ii kjoa ch'o xi s'ín.

¹⁸ K'e nga jye jchat'aà-ná jé-ná, mì tì mé kjotjò
 kochjeén-ne xi kjoa ts'e jé.

*Mé kjoa-ne nga isa ndaà kinchat'aà chraña-lá
 Nainá*

¹⁹ Jñò ndí 'ndsè, k'oaá ma-ne nachrjein i'ndeij,
 tjí'nde-ná nga kitjás'eén jè I'nde-la Nainá xi
 'Nó Tsjeè, koíi kjoa-la jè jní xi tsibíxteèn Jesús.

²⁰ Nga jè kiskíx'a jngoò-ná ndiyá xitse xi fiko-ná
 ñánda tjín kjoabinachon, nga koma kotokjá jè
 nikje cortina xi tjohóya jngoò osen I'nde Tsjeè-la
 Nainá. Jè nikje, k'oaá ngaya-la koni yijo-la Jesús.

²¹ Nga tjín jngoò-ná no'mùì xi 'ñó jeya tíjna xi
 otixoma ya ni'ya-la Nainá. ²² K'oaá ma-ne nga
 mochjeén-né nga isa ndaà kinchat'aà chraña-lá
 Nainá, nga nguì kixi sikhajnaá inima-ná ko nguì
 tíjngoò takoán xi it'aà ts'e, nga jè Cristo jye
 kisítsjeè inima-ná kjoa ts'e jé, ko jè yijo-ná, k'oaá
 ngaya-la koni tsà nguì nandá tsjeè tsaníjno-ne.

²³ Kixi kitsajnaoá kjoa xi titsachiña-lá koni
 s'ín mokjeiín-ná nga mì kijen kikjá-lá takoán;
 nga Nainá, xita kixi-né, siikitasòn-né koni s'ín jye
 kitsjaà 'én-la. ²⁴ Kinchatsji'nde-lá nga 'én ndaà
 kinókjoa-lá xinguiáá mé-ne nga isa ndaà s'e-ná
 kjotsjacha; ko s'eén kjoa xi ndaà tjín. ²⁵ Mikii
 sijchayaá jè nachrjein k'e nga bixoñaá, koni s'ín
 i'nga xita nga mì tì kiì bixoñat'aà-la xíkjín. Ta

saà mochjeén-né nga k'oi-lá nga'ño xinguiáá nga jngoò ìjngoò; ìsaá 'ño kòs'iaán k'e nga yaá nga jye tìnchrobá machraña nàchrjein-la Nainá.

²⁶ Tsà k'oas'ín tjín takoán nga kìnchátsji jé ìsaá k'e nga jye kiyaxkoaán kjoa kixi-la Nainá, mì tì mé jní koma xíxteèn-ne xi ma kjoaáxìn jé-ná. ²⁷ Tà jè kòkò ìsa-ná kjo'in xi 'ño xkón tjín kò ni'ín jngà xi síkjesòn yije xitá xi kondra fi-la Nainá. ²⁸ K'e nga tsà jngoò xitá xi mìkìl síkitasòn kjotíxoma-la Nainá xi kitjoé-la Moisés, tsà tjín jò, jàn xitá xi tsjá 'én nga kixi kjoa, mìkìl mahimacha, nìk'en-né. ²⁹ ¿Kòs'ín beè-la takòn jño, a mìtsà ìsa tse kjo'in ok'in-la jña xitá xi binchanè jè Ki'ndí-la Nainá, kò ochrjekàngui jè jní xi tsibíxteèn, kò tìkoa chjajno-la Inima Tsjeè-la Nainá xi tjín-la kjondaà? Jè jní xi ochrjekàngui, jè-né xi Nainá kisìkjeén nga tsibíndaàjìin-kò xitá jngoò kjoa xitse, kò jè xi kisìtsjeè-ne inima-la xitá koi. ³⁰ Jyee tíjìin-ná nga k'oaá tsò Nainá: “Aán okò-na nga tsjaà-la kjo'in xitá, 'aán tsjaà-la chjí-la.” Ìjngoò k'a tsò: “Jè Na'èn-ná kìindaàjìin-la xitá naxandá-la.” ³¹ ¡Taxkì 'ño tse kjoxkón tjín k'e nga ya kàyaá tsja Nainá xi tijnakon!

³² Tanga tikítsjeèn kòs'ín komàt'ioòn nàchrjein xi jye tsato, k'e nga sa kina'yà ítjòn 'én kixi xi kisìhiseèn-nò, nga kichìkjoa-nò nga tse kjo'in kinìkjoòn. ³³ Kis'eé nàchrjein k'e nga jña xitá kiichjajno-nò kò kiskaàn-kò-nò nga nguixkòn xitá naxandá. Tìkoaá kis'eé nàchrjein nga jño kitsjahi-jtakoo jña xitá xinguiòo xi tìkoa kjo'in nchisìkjeiín. ³⁴ Jño, kjòhimacha xitá xi kjo'in nchisìkjeiín nga ndayá títsajna; kò tìkoa mìkìl kòjti-nò k'e nga

kjòchijé-nò tsojmì-nò, ta saá kjòtsjaá-nò nga jye tjiin-nò nga ján ngajmì tjin-nò tsojmì xi isa ndaà kjoàn xi mikì fehet'aà nita mé nachrjein-ne. ³⁵ Kì nìchija-jèn koni s'ín kjit'aatakòn Nainá nga yaá tjoé-nò jè xi 'ño tse chji-la. ³⁶ Mochjeén-né nga s'e-nò kjoatsetakòn kjoa ts'e kjo'in, mé-ne k'e nga jye kitasòn koni s'ín mejèn-la Nainá, tjoé-nò xi tsjá-nò koni s'ín jye kitsjaà 'én-la xi tso'ba kiichja-ne. ³⁷ K'oaá s'ín chja xojon xi tjit'aà 'én-la Nainá nga tsò:

Ta jngò tò chija-la nga kjoí jè xi sa nchrobá.

Mikì kochrjein-la.

³⁸ Jè xi xita kixi kijnakon-né nga mokjeiin-la, tanga tsà kosit'aà xin, mikì sasén-la inima-na.

³⁹ Tanga jña, mì k'oaá s'eén koni s'ín xita xi its'in fi-ne nga síchija inima-la. Ta saá ya kjiaán ya i'nde ñanda kitjokajin kjo'in inima-ná koi kjoa-la nga mokjeiin-ná.

11

Kjoa xi mokjeiin-ná

¹ Jè kjoa xi mokjeiin-ná, jè-né nga tjin kixi nga tjoé-ná jña kjoa xi chiná-lá; jè-né nga tíngòò takoán nga kitasòn nas'ín mikì titsa'yaá xi kjoa niton. ² Jña xita jchinga kjòtsee, koi kjoa-la nga kòkjeiin-la nga ndaá ki'ya-la.

³ Ta koi-né nga mokjeiin-ná nga kos'ín machiya-ná nga jè Nainá, tà koó 'én-la tsibindaà isò'nde; kisìkatsejèn tsojmì xi mikì tsejèn nga sa itjòn.

⁴ Abel, koi kjoa-la nga kòkjeiin-la, kitsjaat'aà-la Nainá kjòtjò xi isa 'ño ndaà kjoàn, mì k'oaà-ne

koni ts'e Caín. K'oaá s'ín komà-ne nga xita kixi kitsò-la Nainá Abel; kiskoé kjotjò xi ijchòko-la; skanda nachrjein i'nde, tákó k'oaá s'ín tíchja nga mokjeiín-la, nas'ín jye k'en.

⁵ Enoc, tikoá kòkjeiín-la; k'oaá s'ín komà-ne nga kiiko tikon Nainá ján ngajmii; mì tì kii kisakò-ne k'e nga jye kiiko. K'e nga sa tsibijna i isò'nde, Enoc, k'oaá s'ín ki'ya-la nga ndaà kisaseèn takòn Nainá. ⁶ Tsà mìkii mokjeiín-ná it'aà ts'e Nainá, mìkii koma s'eén kjoa xi sasén-la Nainá. Jè xita xi síchrañat'aà-la Nainá mochjeén-né nga ndaà kòkjeiín-la nga tìjna Nainá, tikoá kòkjeiín-la nga ngats'ì xita xi ótsji Nainá, tsjá-la kjotjò xi ndaà tìjn.

⁷ Noé koií-né nga kòkjeiín-la, k'e nga tsibénojmi-la Nainá kjoa xi iskan koma, kisìkitasòn; koó kjoxkón-la nga tsibíndaà jngoò chitso xi 'ño je kji, mé-ne nga mìkii kiyá-ne jña xita ni'ya-la. Noé, nga ndaà kòkjeiín-la, k'oaá s'ín tsibínè-la kjo'in xita isò'nde nga jè tìjn-la; ko jè Noé kitjoé-la kjotjò xi tsjá Nainá nga xita kixi kitsò-la ta koií kjoa-la nga kòkjeiín-la.

⁸ Abraham, nga kòkjeiín-la k'e nga kiichja-la Nainá, kisìkitasòn. Itjokàjìin nangui-la, kii ya i'nde ñánda tà kjotjò tsjá-la Nainá, tanga skanda mìkii tìjìin-la ñánda tífi. ⁹ Koií kjoa-la nga kòkjeiín-la, nga kos'ín kisìjchá yijo-la koni tsà xita xi xìn nangui-la nas'ín ya tsibijna ya i'nde ñánda nga k'oa kitsò-la Nainá nga tsjá kjotjò-la. Ni'ya nikjeé tsibijnaya. Nga kii-isa nachrjein, k'oaá tì komàt'in jè Isaac ko Jacob, xi tikoá k'oas'ín kitsjaà-la 'én Nainá nga ts'e koma nangui. ¹⁰ Abraham tíkoña jngoò-la naxandá xi 'ño ndaà tìjn tàts'en chrjó-la, nga jè

Nainá kiskoòsòn-là kós'ín s̄indaà kò t̄jè-ne Nainá tsibíndaà.

¹¹ Koií kjoa-là nga kòkjeiín-là Abraham, nga nas'ín chjoón 'ndí jè chjoón-là xi 'mì Sara, kò nas'ín jye 'ñó x̄ita jchínga, kis'eé-là nga'ñó nga kisakò jngoò-là ki'ndí jè Sara, koií kjoa-là nga kòkjeiín-là nga Nainá s̄ilkitasòn koni s'ín jye kitsjaà-là 'én-là.

¹² K'oaá ma-ne nga ta jè tajngoò x̄ita jè, nas'ín jye tífehèt'aà nachrjein-là, kjìn jchán ma ixti-là xi t̄jè ts'e k'oaá ngaya-là koni jñà ni'ño xi t̄jìn ngajmii kò tsoṁ xi jncha indii ndáchikon nga mìkiì ma maxkeya.

¹³ Ngats'iì x̄ita koi, k'oaá s'ín mokjeiín-là skanda k'e nga k'en, nas'ín mìkiì kitjoé-là tsojmì xi Nainá k'oas'ín kitsjaà 'én-là nga tsjá-là; ta k'oaá s'ín kjòchija-là koni tsà ta kjìin kijtsee-ne; tsjaá kis'e-là nga kitsò nga mìtsà i j'nde-là, ta nchifahato-né nga títsajna i it'aà nangui. ¹⁴ Jñà x̄ita xi koatsò, k'oaá s'ín bénojmi kixi-né nga saá nchihótsji jngoò nangui xi nguì ts'e koma. ¹⁵ Tsà jè nchisíkitsjeèn nangui ñánda itjokàjìin, okixi-né komá-la kii l̄jngoò k'a-ne j'nde ñánda inchrobà-ne. ¹⁶ Tanga jngoò j'nde nchihótsji xi isa ndaà choòn, j'nde xi ts'e ngajmii. K'oaá ma-ne nga jè Nainá, mìkiì masobà-là nga kitsò-là x̄ita: jè jèe xi Nainá, nga jyeé kisikj̄nandaà jngoò-là j'nde ñánda naxandá-là koma nga ya k̄itsajna.

¹⁷ Abraham, k'e nga kichìt'aà, koií kjoa-là nga kòkjeiín-là nga kiskoé Isaac nga kitsjaàt'aà kjotjò-là Nainá. Tsibijnandaà nga tsjá-là ki'ndí-là xi ta jè tajngoò-ne, nas'ín xó k'oas'ín kitsjaà-ne 'én Nainá it'aà ts'e ki'ndí-là, k'e nga kitsò: ¹⁸ “It'aà ts'e Isaac, kjìn jchán koma x̄ita t̄jè-lè.” ¹⁹ Abraham k'oaá

s'ín kisìkítsjeèn nga Nainá tjin-là nga'ño nga ma-là síkjaáya-là xitá naş'ín jye k'en. Kitjóé ìjngoò k'a-là ki'ndí-là koni tsà jaáya-là it'aà ts'e kjoabiyaà.

²⁰ Isaac, koií kjoa-là nga mokjeiín-là nga kisjét'aà-là Nainá nga kàtasíchikon-t'in Jacob kò Esaú it'aà ts'e kjoa xi iskan koma.

²¹ Koií kjoa-là nga mokjeiín-là Jacob, k'e nga jye tíbiyaà, kisjét'aà-là Nainá nga kàtasíchikon-t'in ingajò ìxti-là José; síngui'ño tsja yá nise-là nga jeya kisikíjna Nainá.

²² Koií kjoa-là nga mokjeiín-là José, k'e nga jye tíbiyaà, tsibénojmi kós'ín komat'in jña xitá Israel nga kitjokàjiin naxandá Egipto. Tikoà kitsjaà okixi it'aà ts'e nindaà-là ñánda kjiko.

²³ Xitá jchínga-là Moisés, koií kjoa-là nga kòkjeiín-là nga jàn sá kisikíjna'ma ki'ndí-là k'e nga sa kits'iin, nga kijtseè nga 'ño ndaà kji isén-là ki'ndí-là, kò mìkiì kitsakjòn-là kjotíxoma-là xitaxá ítjòn ts'e naxandá Egipto.

²⁴ K'e nga jye kòjchínga Moisés, koií kjoa-là nga kòkjeiín-là nga mìkiì kisaseèn-là nga nea-là kitsò-là tsòti-là faraón. ²⁵ Tà saá jè jaàjiin nga kjo'in kisikjeiín kò naxandá-là Nainá, mì k'oa-ne nga kjotsja tsjá-là yijo-là xi kjoa ts'e jé. ²⁶ K'oaá s'ín kiskoòsòn-là nga isa 'ño chjí-là kjo'in xi sìikjeiín xi it'aà ts'e Cristo mì k'oaá-ne nga kjotsja tsjá-là yijo-là xi kjoa nchiná ts'e naxandá Egipto. Kiskoñákjoaá-là kjondaà xi iskan tsjá-là Nainá.

²⁷ Koi-né nga tikoà kòkjeiín-là nga itjokàjiin naxandá Egipto; mìkiì kitsakjòn-là kjoajti-là jè xitaxá ítjòn; kixií tsibijna koni tsà xkon tíbeè-ne Nainá xi nì saá jngoò xitá beèkon.

28 Moisés, nga kòkjeiín-là, tsjachrje s'eí Paxko. K'oaá kitsò-là ngats'ìi xità Israel nga jní sikaàjno xotjoa ni'ya-là mé-ne jè àkjale-là Nainá mìkii sikk'en jñà xi ki'ndítjòn-là ts'e xità Israel.

29 Jñà xità Israel, nga kòkjeiín-là, tsatojiìn jè xi 'mì Ndáchikon Inì koni tsà nangui kixì. Jñà xità Egipto, k'e nga kijtseè, mejèn-là nga k'oa tìs'ín kis'iìn, tanga ta yaá k'en yije ya jjiìn ndáchikon.

30 Nga kòkjeiín-là xità Israel, kisikixòjen chrjó xi tjíndiì-là naxandá Jericó, k'e nga jye kjò itoò naxrjein bíjtindiì-là jé naxandá. 31 Koií nga kòkjeiín-là Rahab xi chjoón chijngui nga mì ya k'en-ko jñà xità xi mìkii mokjeiín-là, koií kjoa-là nga ndaà kijtseètjò jñà xità Israel xi ítjòn ijchò kotsejèn 'ma-là nangui.

32 ¿Mé kjoa xi kènojmi ìsa? Mì-la kii chíya-na naxrjein nga kichjà it'aà ts'e Gedeón, ts'e Barac, ts'e Sansón, ts'e Jefté, ts'e David, ts'e Samuel kò ngats'ìi xità xi kiichja ngajo-là Nainá. 33 Koií nga kòkjeiín-là xità koi nga kis'e i'nga xi kisikijne-là kjoa ts'e kjojchán, xi kixi tsibíndaàjiìn kjoa, xi Nainá kitsjaà-là koni s'ín jye kitsò-là xi tso'ba kiichja-ne, xi tsibíchjoàjto tso'ba xa. 34 Kis'eé i'nga xi kisikits'o nga'ño-là ni'ín jnga, xi itjomachinga-là nga kicha ndojò k'en-ne, xi kis'e ìjngò k'a-là nga'ño nas'ín xk'én kjoàn, xi kis'e-là nga'ño kjoa ts'e kjojchán, xi kisikijne-là xità kjojchán xi kondra ts'e. 35 Kis'eé i'nga íchjín xi kitjoé ìjngò k'a-là xità xíkjin xi jye k'en nga jaáya-là.

Tanga tjín i'nga xi ya k'en-jiìn kjo'in; mìkii kjòmejèn-là nga tsibítsajnandeií, nga k'oaá s'ín kjòmejèn-là nga ìsa ndaà kítsajna k'e nga

kjoaáya-la. ³⁶ Xi i'nga, kisìkjeín kjo'in nga kinìsobà-la, kiskaàn-ko xità, skanda na'ño kichà cadena kisit'aà'ño iya ndayá. ³⁷ Tjín i'nga xi ndajò kisinè nga kinìk'en; tjín i'nga xi kichà serrote kjòjòya-ne; tjín xi kichà ndojò k'en-ne. Xki xi ján chinchimasòn, tà chrjoa-la orrè ko chrjoa-la tíndsó tsakakjá nga 'ño imà chinchima, tsee kjo'in kis'e-la ko 'ño ki'yatoòn. ³⁸ Jñà xità koi, nga 'ño ndaà kòkjeín-la it'aà ts'e Nainá, skanda mikì ok'in-la nga i tsibitsajna isò'nde. Xki xi ján chinchimasòn ya i'nde it'aà xìn ñánda nangui kixi choòn, kóhokji ijìin ijñá ko ingui nguijo ko ngajò xi tix'á ijìin nangui.

³⁹ Ngats'ìi xità koi, koni s'ín nga ndaà kòkjeín-la ndaà ki'ya-la, tanga nijngoò kitjoé-la xi Nainá tjín-ne nga tsjá-la koni s'ín jye kitsjaà-la 'én-la. ⁴⁰ Nainá tsibíndaà jngoò-ná kjoa xi isa 'ño ndaà tjín, mé-ne jñà xità koi, ngásòn kongásòn-kjoaá nga nímé chijat'aà-ná nga kixi kitsajnaá.

12

Ndaà chítsejèn-là Jesús

¹ Nga 'ño kjìn ma-ne xità xi títsajnandii-ná xi ndaà mokjeín-la, k'oaá ma-ne nga tìkoaá jñá, jngoò k'a sikkítsajnaá ngats'ìi kjoa xi sí'in-ná ko kjoa ts'e jé xi tsobà'ño-ná nga konachan-ná; mochjeén-né nga k'oa s'ín s'eén koni jngoò xità xi ongachikon nga chikjoako-la nga kijchò skanda ñánda nga tjín-nè-la nga kijchò. ² Ndaà chítsejèn-lá Jesús; jè tsibíts'ia íjtòn koni s'ín mokjeín-ná ko jè síjngoò kjoa koni s'ín mokjeín-ná. Jesús nga jye tíjìin-la nga koma iskan s'eé-la kjotsja, k'oaá ma-ne

nga kichìkjoa ko-la kjo'in it'aà krò, mìkiì kjòsobà-la koni s'ín k'en; ikjoàn tsibíjnat'aà chrja kixi-la Nainá nga ya tíhotixoma.

³ Tikítsjeèn it'aà ts'e Jesús; kichìkjoa koó-la kjo'in xi tsibínè-la jñà xita jé, mé-ne jñò mìkiì kijta-nò ko mìkiì sikàjeèn-là takòn. ⁴ Koni s'ín titsabixkàn-koò kjoa ts'e jé, kj'eè tsà yá xita xi tsò ikon nga sík'en-nò. ⁵ ¿A jye kijchàajiin-nò koni tsò-nò Nainá nga ixti-la tsò-nò? K'oaá s'ín tíchja xojon xi tjít'aà 'én-la Nainá nga tsò:

Nga ki'ndí-na xan-lè, kì nachrjekàngui-jèn k'e nga síkixiya-lè Na'èn-ná,

ko kì nìkjajen-la takoìn k'e nga síkaká-lè.

⁶ Na'èn-ná síkixiya-né jè xita xi tsjakeè,

tsjá-la kjo'in ngats'ì xi kjoétjò nga ki'ndí-la tsò-la.

⁷ Nainá k'oaá s'ín beèhikon-nò nga ki'ndí-la tsò-nò; tikjioón k'e nga kjo'in tsjá-nò. Ngats'ì xi Na'èn ma, tsjá-la kjo'in ixti-la nga síkixiya. ⁸ Tanga tsà Nainá mìkiì sùikixiya-nò koni s'ín síko ngats'ì xi ixti-la ma, mìtsà kixi kjoa nga nguì ixti-la Nainá maà. ⁹ K'e nga sa ixtiaá, jñà xita jchínga-ná xi tjín i it'aà nangui, kisìkixiya-ná koa ndaà kiyaxkoán. ¿A mìtsà isa ndaà jchaxkoán Na'èn-ná xi tíjna ngajmìl, mé-ne nga kàtas'e-ná kjoabinachon? ¹⁰ Xita jchínga-ná i it'aà nangui tsjá-ná kjo'in nga síkixiya-ná koni s'ín mejèn-la, nas'ín ta chiba nachrjein titsajnaá. Tanga Nainá síkixiya-ná xi kjondaà tsaján mé-ne nga tsjeè kìtsajnaá koni jè Nainá nga tsjeè tíjna. ¹¹ Kixí kjoa, tsjin kjo'in xi kjotsja tsjá, tà kjoaba tsjá nga 'on ma-la yijo-ná, tanga komà iskan-ne s'eé-ná kjoa kixi xi 'nchán tjín nga ndaà kìtsajnaakoáá Nainá ngats'iaá xi bìl'ndeé nga tímakixiyaá.

12 K'oaá ma-ne nga tji-là nga'ño yijo-nò, chjímì'ngaà ndsaa xi mìkì ma síkjaníyá, kò xkó ndsokoò xi tsjìn-là nga'ño; 13 tìnchátsjiòò xi ndiyá kixi nga kàtandaà-ne ndsokoò xi tsá'yá kji, mé-ne nga mìkì ìsà ndaà kotsó'ño-ne.

Kì binchat'aàxìn-là kjondaà-là Nainá

14 'Nchán tìtsajnakoo ngats'ì xitá; tsjeè tìtsajna nga nguixkòn Nainá. Nga nijngòò xitá skoexkon Nainá tsà mì tsjeè tíjna. 15 Ndaà chítsejèn nga nijngòò xitá kosijnat'aàxìn-là kjondaà-là Nainá, mé-ne nga mì k'oaá s'ín komat'ioòn koni tsà jngòò xkà ijñá kiso xi tsja ima-là xi síkìts'ón xitá nga tsjá ch'in-là. 16 Jñò, nijngòò xi xitá chijn-gui koma, kì nachrjekànguiòò tsojmì xi tsjeè; kì k'oaá s'ín 'nè koni kis'ìn Esau nga tà jngòò chroba tsojmì xi ma chine tsatíjna-ne xi jè tíjn-ne nga kòkò-là koni ki'ndí tjòn. 17 Jñò jyeé tíjìn-nò, k'e nga jye komà iskan, Esau k'e nga kjòmejèn-là nga sùichikon-t'in na'èn-là, kinachrjekàngui-né, mì tì kii komà kjòchikon-t'in-ne, nas'ín takó 'ño kiskindàya.

18 [Koni s'ín komat'in xitá Israel nga kjin kjojkón kijtseè], jñò, mìtsà kos'ín ya ijchò kinchat'aà-là nindoò xi ma nìkò, jè nindoò ñánda títi ni'ín jnga, ñánda skanda mì tì kii kjòtsejèn-ne nga jñò choòn kò ñánda tí'ba tjo xkón. 19 Mìkì kina'yà-là jta-là chrjo, tikoà mìkì kina'yà-là jta-là Nainá k'e nga kiichja. Jñá xi kii'nchré-là Nainá, tsibítsi'ba-ne nga majìn-là nga kichja-isa, 20 koií kjoa-là nga mìkì kichìkjoa-là koni s'ín tíjn kjotíxoma xi kisinè-là nga tsò: “Jè xitá xi kosijna jngòò ndsokò ya it'aà nindoò, nas'ín jngòò cho, ndajoó kiyá-ne kò tsà majìn kicháà kotosìkjá yijo-là.” 21 'Ñó xkón tíjn kjoa xi

ki'ya-la, skanda tije-ne Moisés kitsò: “Tsakjoòn jchán-ná skanda chiba-la tíhotsé-ná.”

²² Tanga jñò, yaá ijchò kinchat'aà-là nindoò Sión, jè naxandá-la Nainá xi tíjnakon, xi tije-ne Jerusalén xi ts'e ngajmii, ñánda kjìn jmii àkjale títsajna xi nchisítsjakò Nainá nga jeya nchisíkíjna, ²³ ñánda títsajnajtín ixti-la Nainá xi tjoé-la kjotjò xi ts'e ixtitjòn xi tjít'aà 'ín-la xojon ts'e ngajmii. Ijchò kinchat'aà-là Nainá xi xitaxá tíjna nga jè bíndaàjiin-la ngats'iì xita. Tikoáá ijchò kinchat'aà-là inima-la xita kixi xi Nainá jye kisitsjeè nga ñimé chijat'aà-la. ²⁴ Ijchò kinchat'aà-là Jesús xi osìjnajiin-ná jngoò kjoa xitse kò jè jní-la xi kixíxteèn [nga kisitsjeè-ná] xi isa ndaá chja-ná mì k'oaá-ne koni ts'e Abel [xi síjé nga sindaàjiin].

²⁵ Jñò, t'een kindà yijo-nò. Kì nachrjekànguioò jè xi tíchja-ná. Jñà xita jchinga kjòtseé xi tsachrjekàngui koni s'ín kinokjoà-la i it'aà nangui nga kinikaká-la, mìkii tsajno-la nga kitjoé-la kjo'in. Jñá, isaá 'ñó 'in tjín tsà kinachrjekànguiaá Nainá k'e nga skanda ján ngajmii chja-ná nga síkaká-ná; mìkii kojno-ná nga tjoé-ná kjo'in. ²⁶ Jè nachrjein jè, jta-la Nainá, skanda jè nangui kisìjtiya-la, tanga nachrjein i'nde, k'oaá tsò: “Ijngoò k'a siìjtiya-la, mìtsà tà jè nangui siìjtiya-la koó ngajmii.” ²⁷ Jè 'én, k'e nga tsò “ijngoò k'a siìjtiya-la”, k'oaá s'ín machiya-ná nga tjáxin tsojmì xi xó kisindaà-ne, jñà xi ma oniyá-la, mé-ne nga kítsajna-ne xi mìkii ma oniyá-la. ²⁸ It'aà ts'e Nainá tsjá-ná okixi nga ya kotixomakoáá ya i'nde ñánda mìkii ma oniyá-la. Ndaà chjí-la Nainá jñà kjoa koi. Jeya síkíjnaá kò jchaxkoán koni s'ín sasén-la jè. ²⁹ Nga “jè Nainá,

k'oaá ngaya-la koni ni'ín xi síkjehesòn yije nità mé xi tjín.”

13

Kjoa xi mochjeén nga s'iin jñà xita-la Cristo

¹ Jñò, tìtsjacha xita xinguiòo xi 'ndsè chibá xi it'aà ts'e Cristo. ² Kì nìjchàajioòn jñà xita xi bi-jchókón-nò ni'ya-nò, tìs'in-là nga kàtasíkjáya. K'oaá komàt'in i'nga xita, kiskoétjò xita xi mìkiì beèxkon, tanga àkjale-né.

³ Tìkítsjeèn jñà xita xi ndayá tìtsajna; k'oas'ín t'è-là takòn koni tsà ngàsòn kjo'in tìtsajnaà. Tìkítsjeèn jñà xita xi tíyatoòn koni tsà jñò xi tìkoa k'oas'ín tíyatoòn-nò.

⁴ Jñò xi jye chixàn, ngàsòn jchaxkón xinguiòo. Kì ch'o bitsajnakoo xinguiòo. Nga jñà xi kjoachijngui s'ín, Nainá tsjá-la kjo'in.

⁵ Kì toón 'ñó matsjacha; kàtajngoò takòn koni kji tjín-nò. Nainá k'oaá tsò: “Mìkiì tsjeiin takòn-nò, kò mìkiì tajngoò sìikíjna-nò.” ⁶ K'oaá ma-ne nga ma k'oas'ín kixoán:

Jè Na'èn-ná kòsìko-ná,
mìkiì kiskoán mé kjoa xi siko-ná xita.

⁷ Tìkítsjeèn jñà xita xi chincha ítjòn nga tsakóya-nò 'én-la Nainá; tìkítsjeèn kó s'ín kisìjchá yijo-la xita koi kò k'oaá s'ín chjìngui-là koni s'ín kòkjeiín-la.

⁸ Jesucristo mìkiì fatjìya, tìjè-ne ngojña, tìjè-ne nachrjein i'ndeì, kò tìjè-ne nità mé nachrjein-ne.

⁹ Kì kii nìs'in-là kjohítsjeèn xi kj'ejí tsò kò xi mìkiì yaxkon-la nga xìn ndiyá fikò-ná. Ìsaá ndaà tjín nga jè inìma-ná s'e-la nga'ñó it'aà ts'e kjondaà-la

Nainá mì k'oaá-ne koni ts'e tsojmì xi ma chine; nga jñà tsojmì xi ma chine, nímé nga'ñó kitsjaà-la jñà xi k'oa tjin kjoa kisis'in-la.

¹⁰ Jñá, tjin jngoò-ná i'nde tsjeè [ñánda kitsjaà kjotjò yijo-la Cristo nga k'en], tanga jñà no'miì xi tákó ya síxá it'aà ts'e kjoa jchínga ya Ni'ya xi nikje, mìkì tji'nde-la nga tjoé-la kjondaà nga ya kokjen. ¹¹ Nga jè yijo-la cho xi sík'en jñà no'miì, [mìkì tji'nde-la nga tjoé-la nga skine]; ta jè jní-la cho fiko jè no'miì ítjòn ya i'nde tsjeè-la Nainá xi kjoa ts'e jé. Tanga jè yijo-la cho, it'aà xìn i'nde fiko nga tì. ¹² K'oaá tis'in komàt'in Jesús, it'aà xìn-la naxandá kisikjeín kjo'in, mé-ne nga kisitsjeè-ne naxandá it'aà ts'e xi nguì jní ts'e. ¹³ K'oaá ma-ne jñá, kitjokàjñá naxandá. Jè kjitjingui-lá Jesús nga sikjiaán-koá kjo'in xi jè kisikjeín. ¹⁴ Nga i it'aà nangui tsjin-ná naxandá xi nguì jngoò k'a tíjna nita kjé-ne; jè titsachiñá-lá naxandá xi iskan kotsejèn. ¹⁵ Koi kjoa-la mochjeén-né nga kjit'aà nachrjein jeya sikíjnaá Nainá it'aà ts'e Jesucristo koni jngoò kjotjò xi 'bì-lá Nainá, 'én xi nguì tso'baá bitjo-ne nga bènójmiá yá-né jè. ¹⁶ Kì nìjchàajioòn nga ndaà t'een, tjiì itsé-là xinguiò mé xi tjin-nò; k'oaá tjin kjotjò xi sasén-la Nainá.

¹⁷ Tikitasòn-lá jñà xita xi jncha ítjòn-nò, tiná'yañijon-là. Nga jñà síkinda-nò nga mì jchija inima-nò koi kjoa-la nga tjinè-la nga tsjá-la kindá Nainá. Tikitasòn-lá koni s'in kitsò-nò mé-ne nga nguì kò kjotsja-la sílxá-ne nga mì ba s'e-la; tsà ba s'e-la, nímé kjondaà s'e-nò.

¹⁸ Tijét'aà-là Nainá it'aà tsajen, nga k'oaá s'in tíjngoò takòn-jen nga ndaà tjin kjohítsjeèn-najen,

mejèn-najen nga ndaà s'en-jen nita mé kjoa-ne.
 19 İsaá ndaà síjé-nò nga tìjèt'aà-là Nainá xi it'aà ts'an, mé-ne nga kàtatsjá'nde-na nga nìton kjíkon-nò.

'Én xi fehet'aà-ne

20 Jè Nainá xi tsjá kjoa'nchán xi kisikjaáya-la it'aà ts'e kjoa biyaà Na'èn-ná Jesucristo, xi paxtò ítjòn-la ts'e orrè, jè xi kò jní-la tsibí'ño-ne jn-gò kjoa xitse xi mìkiì kjoehet'aà nita kjé-ne,
 21 kàtasíkixiyandaà-nò ngats'ìi kjoa xi ndaà tjín, mé-ne nga kàtítasòn-ne koni s'ín mejèn-la Nainá; it'aà ts'e Jesucristo, k'oas'ín kàtasíko-ná koni s'ín sasén-la Nainá. ¡Jeya kàtìjna Cristo nita mé nachrjein-ne! K'oaá s'ín kàtama.

22 Bitsi'bà-nò ndí 'ndsè, ndaà choétjò 'én xi tikjiì-nò koni s'ín tìbinè-nò nga ta chiba 'én tikjiì-nò.
 23 Kàtasijiìn-nò jè 'ndseé Timoteo jye tìjnandeí-ne xi kjoa ts'e kjo'in; tsà kjoíi nìton, kjíko-ná k'e nga kjián katsejèn-nò.

24 Tìixat'aà yije jñà xita xi jncha ítjòn-nò kò ngats'ìi xita-la Cristo. Jñà xi Italia ts'e nchisìhixat'aà-nò.

25 Ngats'ioò, jè kàtìjnakò-nò kjondaà-la Nainá.

'Én-lá Nainá xi kjoa ts'e Jesucristo
New Testament in Mazatec, San Jerónimo Tecóatl
Mazateco de S Jeronimo Tecoatl; maa
(MX:maa:Mazatec, San Jerónimo Tecóatl)

copyright © 2013 Wycliffe Bible Translators, Inc.

Language: Mazatec, San Jerónimo Tecóatl

Translation by: Wycliffe Bible Translators, Inc.

Mazateco, San Jerónimo Tecóatl [maa], Mexico

Copyright Information

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mazatec, San Jerónimo Tecóatl

© 2013, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Jul 2024 from source files
dated 29 Jan 2022

9f778253-d34e-5037-af35-7bca16479aa0